

Nagin tact da mes'ura tranter Cuira e Tusaun

■ (anr/rgd) Il cussegl grond n'ha betg inoltrà l'incumbensa da *Rudolf Kunfermann* (pcd, Alvra) areguard l'introducziun dal tact da mes'ura sin il traject da la Viafier retica tranter Cuira e Tusaun. En vista al svilup economic e demografic da la regiun da Tusaun ha pretendì il deputà Kunfermann da la regenza d'examinar la pussaivladad d'inoltrar il tact da mes'ura tranter Cuira e Tusaun. «Tusaun è in center regional ed è dependent da bunas colliaziuns dal traffic public», ha

ditg l'iniziant en il parlament grischun. Per la regenza ha cusseglier guvernativ *Mario Cavigelli* prendì posiziun en sia funcziun sco manader dal departament da traffic. El ha fatg attent al tact existent da mes'ura tranter Cuira e Tusaun sch'ins integreschia er il bus en las ponderaziuns. In ulteriur factur pertutga l'infrastructura. «Per vi dals lungs tschancuns d'in binari na po la segunda lingia da viafier regionala che terminescha oz a Razén betg vegnir prolungada fin a Tusaun senza

grondas cumplettaziuns d'infrastructura», ha declerà Cavigelli. Plinavant ha el fatg attent a la fitg buna colliaziun stradala da la Tumleastga e da Tusaun. Sustegn ha Kunfermann survegnì da la fracziun socialdemocrata e da singuls represchentants liberals. Tuttna n'èsi betg reussì a Kunfermann da persvader il plenum. Las deputadas ed ils deputads han decidì en il senn da la regenza e refusà d'inoltrar l'incumbensa Kunfermann cun 54 cunter 48 vuschs tar otg abstenziuns.